

**PARTORDING NI PARNINGOTAN
ARI HAMAMATE NI TUHAN JESUS
HKBP DISTRIK XXVIII DKI JAKARTA
JUMAT, 29 MARET 2013**

1. **ANDUNGANDUNG (Niuluhon 4 halak Paragenda)**

- U1: Sai ingot ma angka na masa tu ahu, sai tatap ma pardangolanku. Dilelei do ahu, jala loja situtu huhilala, so adong au maradi. Malingkang do hulinghulingku sai hira na hona tutung siala hansit ni sitaonon on
- U2: Hir do hodokhu hira batang aek. Dijorat do au dohot hata gabus jala dilotongi pola gabe marlea situtu huhilala. Holom do parnidaanku siala ilu na maraburan, malala ateatengku, mandate huhilala.
- U3: Diparengkeli nasida do ahu, hira gabe ende reherehe di bagasan sadari manipat. Dipabosur nasida do au dohot angka na paet. Nunga mago las ni rohangku binahen ni hajungkatonnasida.
- U4: Sai tangihon ma soarangku! Sai paeleng ma pinggolMu tumangihon alualungku dohot soara tangishu! Sai tatap ma hoihoingku, jala saiompakhon ma bohiM tu au, so adong pangapul au. Nunga hupaujung pardalananku di hau pinorsilangki.

2. **ENDE SOLO "ANDUNGANDUNG": "O, ALE TUHAN, DI DIA HO" BE. 542 (Ditingki marende soloist manang songleader, masuk ma tu bagas gereja Pandita dohot angka parhalado)**

3. **VOTUM-INTROITUS-TANGIANG PAMUHAI**

(U=Uluan, H=Huria)

(jongjong)

- U1: Di bagasan Goar ni Debata Ama, dohot Goar ni AnakNa, Tuhan Jesus Kristus, dohot Goar ni Tondi Porbadia.

H: Amen

U2: Martangiang ma hita: Ale Kristus, sondang hangoluan; di bagasan hagogoonMu, ditaon Ho do haberniton. Di bagasan habadiaonMu, ditaon Ho do insahinsak dohot reherehe. Di bagasan holongMu, dipelehon Ho diriM tu hau pinorsilang. Nuaeng, hupahusorhusor hami do di bagasan rohanami hauuse ni mudarMu dohot bugangMu di hau pinorsilang pola sahat tu hamamateM.

H : AMEN

(hundur)

4. **MARENDE HURIA No. 254:3,7 "O Jesus Sipangolu" BL. 124**
Pabali sian ahu sude na roa i. Na mangingani ahu mangago tondingki. Ho naeng ihuthononhu, Ho naeng pasangaponhu. O Jesus Tuhanhi.

Dibaheni Tuhanhu asi ma rohaMi. Pauba ma rohangku sai pargogoi ma i. Tongtong ingani ahu, huhut sai togu au. tu dalan na ture.

5. **U3 : (manjahahon NARASI I : LUKAS 22: 54-62)**

22:39 Dung i laho ma Ibana tu balian, tu dolok Jetun, songon na somal; jala diihuthon angka siseanna Ibana. 22:40 Asa dung sahat Ibana tusi, ninna ma mandok nasida: Martangiang ma hamu, asa unang bongot hamu tu bagasan pangunjunan! 22:41 Anggo Ibana dipapulik ma dirina sian nasida, arga tuk dangguron batu, marsinggang ma Ibana martangiang songon on: 22:42 Amang, aut olo ma Ho nian pasalpohon siinumon on sian Ahu! Alai unang ma rohangku saut, roham ma! 22:43 Alai diida Ibana ma surusuruan sian banua ginjang i, na margogoihon Ibana. 22:44 Jala di parungkilonna i, lam digogo ma martangiang; jadi songon mudar na himpal do madekdek hodokna i tu tano. 22:45 Jala hehe ma Ibana sian na martangiang i, mandapothon siseanna; jadi tarpodom ma nasida didapot, dibahen arsak ni rohanasida. 22:46 Gabe ninna ma mandok nasida: Boasa ma tung modom hamu?

Hehe ma hamu martangiang, asa unang hamu bongot tu pangunjunan!

U4: (*manjahahon Refleksi: Mabiari*). Mabiari do Tuhan Yesus. Songon jolma Ibana, mabiari do Ibana siala diboto na naeng sitaononNa. Hir do hodokNa songon mudar na himpal madekdek tu tano. Dijouhon do : “Ale Amang, aut olo ma Ho nian pasalpohon siinumon on sia Ahu”. Alai diboto Jesus do ndang lomo ni rohaNa na saut, lomo ni roha Ama i do. Dung i martangiang ma Ibana pasahathon ngoluNa tu bagasan tangan ni Ama i, ninna : “Alai unang ma rohangKu saut, rohaM ma”. Dipatuduhon Jesus do saluhutna holan lomo ni roha ni Ama i do na marmudumuduhon ngolu ni na porsea. (hohom hirahira 10 detik).

6. **MARENDE HURIA BE 78“O ULU NA SAP MUDAR”** BL 158

O ulu na sap mudar Binaen ni bugangMi
Na sian jangar-jangar Sisungsang duri i
O ulu hatongamon Hian do tumpalMi
Ditaon Ho haleaon Ho naeng sombaonki?

7. **U1 : (*manjaha NARASI II: LUKAS 22:54-62*)**

22:54 Dung ditangkup, diboan nasida ma Ibana manogihon tu bagasan jabu ni sintua ni malim i. Alai mandaodao ma si Petrus mangihuthon. 22:55 Dipagalak nasida ma api di pogu ni alaman i jala rap hundul ma disi, gabe ro ma si Petrus juguk tu tongatonganasida. 22:56 Dung i diida naposo boruboru sahalak ma ibana juguk mardonokkon api i, dinolnol ma ibana, ninna ma: Dongan ni Halak an do on, tahe! 22:57 Alai disoadahon do Jesus, didok ma: Nandang hutanda Ibana, inang! 22:58 Dung i satongkin nari, diida sahalak na asing ma ibana jala ninna ma: Sada sian nasida i do ho! Alai didok si Petrus ma: Nandang na tutu i, amang! 22:59 Dung salpu hirahira sajom, diondolhon sahalak na asing muse, mandok: Tongon do, dohot do halak on donganna najolo, jala halak Galilea do i. 22:60 Alai didok si Petrus ma: Nandang

huboto na nidokmi, amang! Mandok i dope ibana, mamintor martatahuak ma manuk. 22:61 Jadi humusor ma Tuhan i, dibereng ma si Petrus, gabe diingot si Petrus ma hata ni Tuhan i, i ma na nidokna i tu ibana: Andorang so martatahuak manuk i annon, nunga tolu hali Ahu soadahononmu! 22:62 Jala ruar ma ibana, tumatangis gogogogo

U2 : (manjaha Refleksi: Holong dohot roha na tungki). Dung ditangkup Jesus, sisean hinaholongan ni rohaNa i mansoadahon Ibana 3 hali. Petrus, sisean naung 3 taon rap dohot Jesus, na marnida halongangan na binahen ni Jesus mangalehon mangan 5000 halak marhite 5 roti dohot 2 dengke, na hea mardalan di ginjang ni aek nang pe naeng lonong siala hurang haporseaonna; halak na manghatindahon Jesus do Mesias; dihaposi Jesus manguluhon angka sisean; hape laos ibana do na mansoadahon Jesus siala laho paluahon dirina sandiri. Diboto Jesus do i na naeng disoadahon si Petrus Ibana 3 hali, alai tongtong holong rohaNa tu si Petrus. Ditatap Jesus ma si Petrus uju martahuak manuk di bagasan roha na tungki alai huhut di bagasan holong ni roha. Suang songon i do hita, uju ditahopi parmaraan, na olo do hita mansoadahon Jesus i. Nang pe songon i hita, tongtong do dihaholongi Jesus, gariada jolma na manulak Ibana pe dihaholongi do. (*Hohom hirahira 10 detik*).

H : *Sai sesa ma hami siala na husoadahon hami Jesus uju ro pangunjunan manahopi ngolunami. Sai pargogoi ma hami asa sai tongtong marhaposan tu Ho hami.*

U3: Tongtong do dihaholongi Debata angka na tumadinghon dalanna, mulak tu dalan ni Debata jala marhaposan tu Ibana. Amen.

8. MARENDE HURIA No. 88:3 “Jesushu naung manobus ahu” BL.106

Jotjotnai husoadahon Ho Sipangolu tondingkon

*Mabiar lao manghatindanghon
Ho na manghophop au tongon
Hupuji nasa asiMi, alai gumodang holongMi*

9. U4 : MANJAJA EPISTEL: JESAYA 53:1-9

10. MARENDE HURIA NO. 622 : 1, 2 “Mansai nalnal di angka partingkian”

*Mansai nalnal di angka partingkian, sinondang ni silangMu Tuhanh
Sian hatiuronna marsinondang holongNa na so halompoan i
Sudena bangso do marpanghirimon tu sondang ni asi ni roha i
Songon parluga na manghalungunhon parbinsar ni mata ni ari i*

*SilangMu Kristus tanda ni holongMu pahisar tondi na magopu i
Mangalonongkon sasude dosangku mabaor tu laut asi ni rohaMi
Naung tubu hami gabe na imbaru, na niurasan sian dosa i
Ala mudarMu na niusehonMu, di Golgata, di hamamateMi.*

11. U1: (manjaha NARASI III: LUKAS 23:13-25)

23:13 Alai didokkon si Latus ma angka sintua ni malim, angka panungganei ro di natorop i marpungu, ninna ma mandok nasida:
23:14 Diboan hamu do Halak on tu jolongku, sipabalik bangso didok hamu; jala di jolomuna hutangkasi i, gabe ndang adong jumpang ahu di Halak on sala, angka na tinuhashonmuna tu Ibana.
23:15 Si Herodes pe songon i do, disuru do Ibana mulak tu jolonami; asa ndang adong parulaonna, na tama mambahen Ibana marutang hosa. 23:16 Dibahen i lasahanku ma Ibana, asa pinalua.
23:17 Naung i aturan, paluaonna sahalak tu nasida di pesta i. 23:18 Alai sude nasida sasoara manjoujouhon: Pusa ma on! Si Barabas ma palua di hami! 23:19 Alai ala ni guntur naung tubu di huta i jala ala ni partodosonna, umbahen na tarhurung ibana. 23:20 Gabe diulahi dipanghulingi si Latus ma nasida, ai naeng paluaonna Jesus. 23:21 Alai dipanjoujouhon nasida: Parsilangkon,

parsilangkon Ibana! 23:22 Jala patoluhalihon ma didok tu nasida: Ai aha do na jat dibahen Halak on? Ndang jumpang ahu agia aha di Ibana na tau gabe marutang hosa. Dibahen i lasahanku, dung i paluaonku ma Ibana. 23:23 Alai dipangiar be do soarana manosahi ibana, mangido parsilanghononhon Ibana; jala siat ma joujounasida. 23:24 Jadi dipaputus si Latus ma, pasauton nama pinangido ni rohanasida i. 23:25 Dipalua ma halak na pinangidonasida i, na tarhurung ala ni na guntur dohot ala ni todostodos; ia Jesus dipasahat ma guru roharohanasida.

U2 : (*manjaha Refleksi*: Marsak). Angka Sintua ni malim, panungane i ro di na torop marpungu mangido tu si Latus asa mamparsilanghon Jesus, jala paluahon si Barabas, panamun i. Angka na tumangihon pangajaranNa, jamitaNa, na marnida halongangan na binahenNa, na hinaholonganNa, angka i do na mamillit parjahat i asa dipalua, jala mangido asa diparsilanghon Jesus i huhut manadinghon Ibana di hau pinorsilang i.

H: *Ale Tuhan, sai ajari ma hami asa unang hami manadinghon Ho, urupi ma hami asa tongtong marsihohot haporseaonnami tu Ho. AMEN.*

12. MANGHATINDANGHON HAPORSEAON

U4: Tahatindanghon ma hata haporseaonta i songon na hinatindanghon donganta di sandok portibi on, rap ma hita mandok : “Ahu porsea....”

13. KOOR

14. BOABOA SINGKAT NI TINGTING.

15. MARENDE HURIA NO. 76:1-4 “Sada nama sangkap...”, BL.199 (Huhut papungu pelean 1a, 1b).

Sada nama sangkap ni rohangku, di sandok portibion

*Ndang tagamon na so las rohangku, molo jumpang au inon
Naeng ma sai ingoton ni rohangku, na binaen ni Jesus tu tondingku
Uju pinorsanNa i, saluhutna dosangki*

*Ingkon sai Ibana ingotonhu uju na tarpajal i
Tu hau pinarsilang ginantungkon, sai mabaor mudarNa i
Ai humophop au ditaon uasNa, asa dohot au muse upaNa
Ai ditatap do au on, di pandokNa : "Nunga sun".*

*O Jesushu sai paingot ahu di dosangku, di basaM
Ai andorang di na holom ahu dipalambas Ho rohaM
Nunga lelung dilului Ho do, au na lilu asa unang mago
Ditaon Ho na bernit i, lao manobus tondingki*

*Gok di Ho ma au ale Tuhanhu, jala Ho ma jambarhi
Dok ma "Amen" rongkom ma goarMu tu bagasan rohangki
Lomo ni rohaM ma sungkunonhu, di sude na naeng ulahononhu
Olo, ima padanhi tu Ho Jesus Tuhanhi.*

16. JAMITA : MATEUS 23:33-39

**17. MARENDE SOLO (SONGLEADER) "DI DIA HO DI NA
TARSILANG TUHANKI" BE. 618 (Ruas hohom huhut papungu
pelean II)**

**18. PITU PANDOHAN NI JESUS DI HAU SILANG. (dijahahon
Parjamita).**

Parjamita : Pitu pandohan ni Jesus di hau silang i,
paingothon huhut mangarahon hita asa lam solhot
mananda Ibana. Antong tangihon jala tanda ma Ibana
marhite pandohanNa on:

Hata na parjolo: Manesa dosa (Lukas 23:34)

*"Ale Amang marparmuati ma rohaM mida nasida, ai ndang diboto
nasida nabinahen nasida i."*

Holan sahalak Raja do nampuna Holong na Balga na tau manatap simalolong ni angka na mambursikhon Ibana, jala na mandok “sai sesa ma nasida..” Halak na mabugang, marsitaonon, jala digantung tu hau hira parjahat, alai Ibana do manesa dosa ni angka mamparsilanghon Ibana.

Hata na paduahon: Haluaon (Lukas 23:43)

“Situtu do hatangKon tu ho: sadarion do ho rap dohot Ahu di Paradeiso”

Uju sahalak parjahat mangido asa diingot Jesus ibana molo dung sahat tu Harajaon ni Debata, dilehon Jesus do bagabaga haluaon tu ibana. Di bagasan pangaramotion ni Jesus, dilehon do haluaon tu angka na olo porsea tu Ibana.

Hata na patuluhon: Mandok mauliate (Johanes 19:26)

“Ndi ma, inang, anakmi!”

Di tonga ni sitaononNa, dipasahat Ibana do donganna tu inangNa, jala inangNa tu donganNa i. Nandang mansohot holong di ujung ni ngoluNa di hasiangan on. Holong ni Jesus tongtong mangolu nang pe mate Ibana.

Hata na paopathon: Sitaonon ni partondion (Matius 27:46)

“Ale DebatangKu, DebatangKu boasa tung tadinghononMu Ahu?”

Sai hira na mago do suara ni Debata uju dihilala Jesus holom saluhutna diujung ni ngolu hajolmaonNa. Diboto Jesus do lapatan ni na gabe jolma di tingki panosak ni sitaonon na bernit di bagasan ngoluNa. Alai nang pe songon i, tongtong do joujou Ibana tu AmaNa i laho pasahathon ngoluNa.

Hata palimahon: Sitaonon ni pardagingon (Johanes 19:28)

“Mauas Ahu!”

Ndada holan sipanganon di haringkothon daging, alai tarlumobi ma siinumon. Mauas do daging molo mahiang aruaru dohot pamatangna, songon i ma panghilalaan ni Jesus, mauas! Ganup jolma na male jala mauas diboto nasida ma paboa Jesus pe nunga hea manghilala si songon i. Alai holan Ibana do na tau pataluhon pangunjunan na ro uju male dohot mauas.

Hata paonomhon: Hamonangan (Johanes 19:30)

"Nunga marujung!"

Ndada hata hataluan ianggo hata on, alai pos ni roha paboa saluhut na sangkap maradophon ngoluNa nunga sidung, nunga marujung! Hamonangan nunga dompak dijoloNa.

Hata papituhon: Pasahathon tondiNa (Lukas 23:46)

"Amang! tu bagasan tanganMu ma Hupasahat tondingKu!"

Ai mangholom ma mataniari di luat i. Maribak ma hirehire na di Bagas Joro i, bola dua. Nandang tolhas mataniari tu dolok Golgata. Di inganan i ma Jesus pasahathon ngoluNa dohot tondiNa tu Ama i, songon sahalak anak marpos ni roha pasahathon ngoluna tu pangaramotion ni amana, songon sahalak boru na sonang panghilalaanna uju dihaol inana.

Tu bagasan tanganMu ma Hupasahat tondingKu!
Nunga ditarik na holom i na tiur i, gabe holom saluhutna. Molo songon i na so ro be hatiuron i? Nandang binsar be hatiuron i?
Tarpaima do sandok portibi on di haheheon ni Sipalua i huhut mamboan hatiuron na imbaru.

19. MARULAON NA BADIA (AGENDA HKBP)

20. ANGKA ENDE UJU MARULAON NA BADIA:

1. BE. No. 152 "Jesus na mamorsan" BL.120

Jesus na mamorsan dosa ni portibi on, pangolu hami
Jesus na marmosan dosa ni portibi on, pangolu hami
Jesus na mamorsan dosa ni portibi on, sai pasonang hami
Amen, Amen, Amen

2. BE. No. "O Jesus naung sineat"
O Jesus naung sineat, di hau na pinarsilang.
RohaM tongtong daulat, nang uju Ho tarhilang.
Marutang hosa hami, ditaon Ho dosanami, Asi rohaM o Jesus.
 Pelean na badia, na masuk tu Jahowa.
 Singkat ni manisia, na so daulat roha.
 Di taon Ho dosanami, so i lao hami, Asi rohaM o Jesus.
Pelean na badia, Jinalo ni Debata
Panaon ni manisia Na pasohothon bada
Sai sesa dosanami Ho hatigorannami, Asi rohaM o Jesus
 Pelean na badia DagingMu sipanganon
 Di angka na porsea MudarMu sinumon
 Sai ro ma maringanan Marhite parpadanan Di hami on, o
 Jesus

3. BE. No.681 "Ale Amang Asi RohaM"
Ale Amang asi rohaM si au pardosa on
Unduk do rohangkon nuaeng marsomba di joloM
Unang jujur unang jujur angka dosangki
Sai salpuhon sai salpuhon sian rohaMi
 Amang sai pargogoi ma au di hasiangan on
 TondiM pasaor tu tondingkon pamalum rohangkon
 Sai usehon, sai usehon TondiMi tu au
 Asa monang maralohon parungkilon au
Mauliate ma di Ho O Tuhan Debata
Sai jalo ma au on muse tu surgo banuaM
Asa sonang, asa sonang raphon Ho disi
Pujionku ma goarMu salelengna i

4. BE. No.84 "Aut Na Ginorga tu Rohangku" BL.195

Aut na ginorga tu rohangku, bohiM di na lao mate Ho
Aut na huingot o Tuhanku, tongtong pangkophopMi di au
Ai Ho do paluahon ahu, dosangku do pinorsanMi
Didaoni Ho parsahitonku, martua au binahen ni i
 Sai jalo m'au ale Tuhanku. Baen upa ni na tinaonMi
 Sai naeng ingoton ni rohangku, tung sasude na binaenMi
 Humophop au pardosa godang, dibahen holong ni rohaM
 Hinorhon ni tarbaen au sonang, laho mandapothon
 banuaM

Mauliate ma rohangku, di Ho o Jesus Tuhanki
Ho naeng tongtong haholonganku Marningot denggan basaMi
Antong sai tiop ma tanganku, manogu au tu lambungMi
Dijalo Ho do tangiangku, sai pos do rohangki di si

5. BE. No.449 “Sai Solhot tu SilangMi” BL.300

Sai solhot tu silangMi, Jesus Ingananku
Mual na mabaor disi, I ma inumonku
SilangMi, Tuhanki I ma pujionku
Paima sogot sahat au, I endehononku
 Lao ma au tu silangMi, I haporusanku
 Sai asi ma rohaMi unang tulak ahu
 SilangMi, Tuhanki I ma pujionku
 Paima sogot sahat au, I endehononku
Domu ma tu silangMi, I ma tioponku
Asa unang lilu au, Ho ihuthononku
SilangMi, Tuhanki I ma pujionku
Paima sogot sahat au, I endehononku
 Laos maniop silangMi sai paimaonku
 GokkonMi tu surgo I, tu siteanonku
 SilangMi, Tuhanki I ma pujionku
 Paima sogot sahat au, I endehononku

6. BE. No.9 “Hupuji Holong ni” BL.110

Hupuji holong ni rohaMu
O Tuhan Jesus Rajangki
Tu Ho hulehon ma tondingku
Ai i do pinangidoMi
Huhalapahon ma diringku
Mamingkir holong ni rohaMu

BP/FH/HM/AA 2013